



Deddf Tai (Cymru) 2014

2014 dccc 7

RHAN 2

DIGARTREFEDD

PENNOD 2

CYMORTH I BOBL SY’N DDIGARTREF NEU O DAN FYGYTHIAD O DDIGARTREFEDD

Cyffredinol

99 Dehongli’r Bennod hon a mynegai o ymadroddion wedi eu diffinio

Yn y Bennod hon—

mae i “angen blaenoriaethol am lety” (“*priority need for accommodation*”) yr ystyr a roddir gan adran 70;

ystyr “awdurdod gwasanaethau cymdeithasol” (“*social services authority*”)

(a) mewn perthynas â Chymru, yw cyngor sir neu fwrdeistref sirol wrth arfer ei swyddogaethau gwasanaethau cymdeithasol, o fewn ystyr adran 119 o Ddeddf Gwasanaethau Cymdeithasol a Llesiant (Cymru) 2014, a

(b) mewn perthynas â Lloegr, yw awdurdod lleol at ddibenion Deddf Gwasanaethau Cymdeithasol Awdurdodau Lleol 1970, fel y’i diffinnir yn adran 1 o’r Ddeddf honno,

ond mae cyfeiriad at “awdurdod gwasanaethau cymdeithasol” i’w ddehongli fel cyfeiriad at awdurdod gwasanaethau cymdeithasol ar gyfer ardal yng Nghymru yn unig, oni bai bod y Rhan hon yn darparu’n benodol fel arall;

ystyr “awdurdod tai lleol” (“*local housing authority*”)—

(a) mewn perthynas â Chymru, yw cyngor sir neu fwrdeistref sirol, a

Statws This is the original version (as it was originally enacted).

(b) mewn perthynas â Lloegr, yw cyngor dosbarth, cyngor bwrdeistref yn Llundain, Cyngor Cyffredin Dinas Llundain neu Gyngor Ynysoedd Scilly,

ond mae cyfeiriad at “awdurdod tai lleol” i’w ddehongli fel cyfeiriad at awdurdod tai lleol ar gyfer ardal yng Nghymru yn unig, oni bai bod y Bennod hon yn darparu yn benodol fel arall;

mae i “camdriniaeth” (“*abuse*”) yr ystyr a roddir gan adran 58;

mae i “camdriniaeth ddomestig” (“*domestic abuse*”) yr ystyr a roddir gan adran 58;

mae i “carchar” (“*prison*”) yr un ystyr ag yn Neddf Carchardai 1952 (gweler adran 53(1) o’r Ddeddf honno);

mae i “ceisydd” (“*applicant*”) yr ystyr a roddir gan adran 62(3) ac adran 83(3);

ystyr “corff gwirfoddol” (“*voluntary organisation*”) yw corff (ac eithrio awdurdod cyhoeddus neu awdurdod lleol) nad yw ei weithgareddau yn cael eu cynnal er mwyn gwneud elw;

mae i “cysylltiedig” (“*associated*”), mewn perthynas â pherson, yr ystyr a roddir gan adran 58;

ystyr “cymorth o dan y Bennod hon” (“*help under this Chapter*”) yw budd unrhyw swyddogaeth o dan adrannau 66, 68, 73, neu 75;

mae i “cynorthwyo i sicrhau” (“*help to secure*”), mewn perthynas â sicrhau bod llety addas ar gael, neu nad yw’n peidio â bod ar gael, i’w feddiannu, yr ystyr a roddir gan adran 65;

mae i “cysylltiad lleol” (“*local connection*”) yr ystyr a roddir gan adran 81;

ystyr “deddfiad” (“*enactment*”) yw deddfiad (pryd bynnag y’i deddfwyd neu y’i gwnaed) a gynhwysir yn y canlynol, neu mewn offeryn a wnaed o dan y canlynol—

(a) Deddf Seneddol,

(b) Mesur neu Ddeddf gan Gynulliad Cenedlaethol Cymru;

mae i “digartref” (“*homeless*”) yr ystyr a roddir gan adran 55 ac mae “digartrefedd” (“*homelessness*”) i’w ddehongli yn unol â hynny;

mae i “digartref yn fwriadol” (“*intentionally homeless*”) yr ystyr a roddir gan adran 77;

ystyr “landlord preifat” (“*private landlord*”) yw landlord nad yw o fewn adran 80(1) o Ddeddf Tai 1985 (yr amod landlord ar gyfer tenantiaethau diogel);

ystyr “llety cadw ieuencid” (“*youth detention accommodation*”) yw—

(a) cartref plant diogel;

(b) canolfan hyfforddi ddiogel;

(c) sefydliad troseddwr ifanc;

(d) llety a ddarperir, a gyflenwir ac a gynhelir gan Weinidogion Cymru o dan adran 82(5) o Ddeddf Plant 1989 at ddiben cyfyngu ar ryddid plant;

(e) llety, neu lety o ddisgrifiad, a bennir am y tro gan orchymyn o dan adran 107(1)(e) o Ddeddf Pwerau Llysoedd Troseddol (Dedfrydu) 2000 (llety cadw ieuencid at ddibenion gorchmynion cadw a hyfforddi);

mae i “llety sydd ar gael i’w feddiannu” (“*accommodation available for occupation*”) yr ystyr a roddir gan adran 56;

ystyr “lluoedd arfog rheolaidd y Goron” (“*regular armed forces of the Crown*”) yw’r lluoedd arfog rheolaidd fel y’u diffinnir gan adran 374 o Ddeddf y Lluoedd Arfog 2006;

mae i “o dan fygythiad o ddigartrefedd” (“*threatened with homelessness*”) yr ystyr a roddir gan adran 55(4);

mae i “person cyfyngedig” (“*restricted person*”) yr ystyr a roddir gan adran 63(5);

ystyr “rhagnodedig” (“*prescribed*”) yw wedi ei ragnodi mewn rheoliadau a wnaed gan Weinidogion Cymru;

mae i “rhesymol parhau i feddiannu llety” (“*reasonable to continue to occupy accommodation*”) yr ystyr a roddir gan adran 57;

mae i “tenantiaeth sicr” (“*assured tenancy*”) a “tenantiaeth fyrddaliol sicr” (“*assured shorthold tenancy*”) yr ystyr a roddir gan Ran 1 o Ddeddf Tai 1988;

mae i “yn derbyn gofal, yn cael ei letya neu’n cael ei faethu” (“*looked after, accommodated or fostered*”) yr ystyr a roddir gan adran 70(2);

ystyr “yn gymwys i gael cymorth” (“*eligible for help*”) yw nad yw cymorth o dan y Bennod hon wedi ei wahardd gan Atodlen 2.